

一
合
相

上

蘇州學



一合相

古本戲曲叢刊五集

據北京圖書館藏
舊鈔本景印原書
葉心高一八六毫
米寬一二七毫

(印章覆蓋處依次為篇而義則等字)

引

云亭山人曰傳奇雖小道其旨本於三百篇



春秋用筆行文又左國太史公也是則才非左史不得妄作傳奇矣以余乞食之蕭僅合蓮花之落奚敢謬附知音擅稱填譜徒成畫犬貽笑大巫耶惟以子夜之歌本出吳儂摹寫人情物態亦足為南詞之助與其真晦於文不若直陳其情事苟可傳何必拘拘於餽飮月露也哉一合相一劇乃元季明初事先見

於鳳洲散稿有機山樵者艷其情採置奚囊歷有年
歲今秋與余相遇石頭城下出以見眎不惟氣節風
概卓然可傳其間興邦喪邦功罪皎皎惜明史獨不
及尤雲意當時賢豪輩出翊贊興王如雲之功列尚
廁斗量而不足數耶然則松陽逸事賴弇州燼餘之
文以傳設入梨園洵可維世俗而發人深省也余雖
丐者寧獨無意於訖揚風雅乎爰徵鑑目編年記述
之譬彼演義盲詞甘為巷舞本非曉風殘月不奪詞

壇他日五父衢頭有人濫聽則是三生石上於我有
緣耳

嘉慶四年暢月石丐編次并識

夢餘生曰溯叙緣起藺明古雅至徵事於史氏
之闕文則又令人想見海上有仙山山在虛無
縹緲間也

尤雲傳

弇州山人著

尤雲字權則浙之松陽人也父名元延祐中登進士
拜翰林學士出刺薊州報最擢左樞密晚歲舉四子
雲其次也雲性穎異讀書過目成誦不屑為經生言
好百家諸子旁及太乙兵陣之書下筆數千言立就
其事親孝篤愛兄弟隨召任得歡心母地促雲筮仕
因慨然曰人生獲侍父母桑榆樂田里以供甘旨又
何求矧世競牢石豈與希榮者為儔蓋是時帖木不

花當國政出私門也父感之上疏引退未報乃先遣
雲就婚余太保第余名心生二女長佩珊次佩玉皆
淑慧涉書史佩珊與雲諧伉儷日夕吟諷不倦嘗伴
雲夜讀望月撫琴而歎雲詢其故乃曰似妾之羸弱
焉能與君常覩月圓乎言已嗚咽相對各泣下誓世
世為夫婦未幾召病卒京師兆氏亦尋病終訃將至
而佩珊適病劇雲悲痛與訣別珊謂曰幸侍巾櫛甫
載餘但念蕤婉之情不能忘今妾命如葉夫復何言

若死君當娶雲泣對以鰥守終珊曰君不聞無後為
不孝之大乎勿以妾一身累君千載名也君無它志
願以妹代若何雲不可珊求其母汪轉告於余務強
允乃瞑雲荼毒至此幾不欲生也玉少珊十餘歲與
珊最協雲亦素面玉色媚而正意暱而嚴宛轉避嫌
惟不欲相遠當雲踉蹌而奔訃也玉假故不出令侍
婢繡奴携錦囊以贈且囑曰善保千金軀慎毋過傷
也雲領之至舟次發囊得拭泪鮫綃蝴蝶香囊各一

并附以詩其一云自憐少小未知情一任天真爛漫
行姊有遺言留自代此身遂許誓生平其二云舊製
相看各欲悲而今切莫啓葳蕤貽君新刺隻蝴蝶暗
祝他年並翅飛其三云鮫綃一幅織鴛紋拭得新痕
與舊痕此日殷勤勞拾取知君新舊本無分其四云
瀕行欲送步仍違竊恐酸心博衆誹但使小鬟通一
語莫教辛苦寄當歸雲自此人不禁懷抱若失矣初
名之在樞府也與門下侍郎耶律珠議山左罷兵事

意齟齬召即疏劾珠被貶銜念順帝即位珠以辨佞
獲寵同平章事欲傾陷召遂以召嘗暗通山左賊黨
倡議罷兵詔下召四子獄籍其家雲與兄申及弟慎
臣皆被繫創甚有大被易長板之歌聞者憫焉掌刑
司脫脫材者性任俠尚氣節知其寃為謀於珠所親
厚者請釋珠難之材返解誓曰大丈夫不能救人於
水火安用生為且四方兵革擾動秉國政者不思危
卵而欲殺不辜糜爛至此尚徃升斗祿耶遂入禁巷

遣之隨自刎雲兄弟徒步冰雪中乞食夜行慮詰也
乃各遁去余心居里閉聞其事欲悔婚有富室王氏
子以千金幣為納徵余利之告於珮玉曰雲死在旦
夕即免亦難為依計况本非媒妁言耶熟籌當亟玉
歛容曰父母之命在先兒已心許之矣寧死無貳余
怒逼之汪力止不聽乃夜拽玉出門外盡脫其簪珥
曰任擇貧也玉自度終不免北向歎歎絰其衣縫抱
石至河干自沉適老尼濟道者舟經急救之得蘓詢

其故哀之因携之歸王飲泣日持誦楞經焚香懺悟
梵鐘聲裏其境與情惟盡歸河滿也當是時元季失
政太祖定昇金陵求勝國直臣後令舉孝廉雲例與
旋登第時年方三十有七也會張士誠據兵抗吳越
劉基薦雲知兵可大任詔擢兵部尚書使持節都督吳
會雲與士卒同甘苦賞罰無私人心奮起不折矢而
士誠黨盡解散天下大定上嘉之晉秩太傅賜第京
邸嘗入直議事至夜分撤金蓮燭令衛士掖歸其寵

榮如此然雲以亂離失偶時鬱悒於胸中州虞司農
名廷有愛女壽媛年十六慧而能詩知夙世事父母
為擇壻媛輒不樂載審之始言曰我本浙西余氏女
吾夫尤雲也約再世緣姑待之遂不復強至是虞欲
婚之雲不察其意以已聘力辭事聞於上乃強令委
禽焉雲遂乞省墓疏上可蓋欲藉訪珮玉也迨歸而
余氏家已遊兵發矣因遊吳門遇同學王蒙倪瓚高
啓輩托詩酒以遣日會言及處郡聞妙菴珮玉事雲

驚慟欲絕因亟往訪之叩菴門玉詰之再并云以何
為信雲誦詩始得入玉出戶低徊顧盼不能語相向
哭失聲左右侍者皆泣助雲玉悲哀雲欲以禮迎至
其家玉不可曰吾既為空門守志女矣幸得見君復
何求君其善視新人勿以見女情諒玉也雲知不可
強乃撫事入告詔嘉許綽楔其菴曰貞白且令虞諏
吉偕女詣浙成合卺禮壽媛知其事隨至菴所顧視
佩玉則依然妹也具述再生事鑿鑿悲且喜者久之

咸以為情之所鍾縱歷萬劫其情不朽也佩玉雖長
於壽媛而事以姊然遂以空門終雲歷仕垂四十餘
年退食暇夫婦相娛樂嘗語人曰破鏡圓于隔世吾
尤雲其千古獨也國門傳為異事至成祖朝始乞骸
骨歸田里詔獎其門晉爵崇國公二妻封吳國越國
夫人舉子四蕃芬皆成進士蕙及芳蔭尚寶卿皆虞
出以孝聞

史氏曰節義之風由來尚矣余觀尤雲與佩珊隔世

復婚事。近于誕然一情之感。而精衛填石。鴛鴦交
鳴。傳者比比。何獨論其烏有耶。矧佩玉之誓。死靡他
終。全其貞。脫脫材之義。不惜死。豈非卓可傳。與彼余
心者。尚復有人心哉。宜其灰燼也。